

每週經課朗誦經文(巴克禮漢羅/教羅)2012/12/02

共同經課 - 1

耶利米書三十三章十四節~十六節

14 耶和華講，看 ah，日子 beh 到，我應允以色列家 kap 猶大家 ê 好話，我 beh hō伊成。15 當 hit 日 hit 時，我 beh kā 大衛發生義 ê 枝，伊 beh tī 地上行公平 kap 公義。16 Tī hit 日猶大 beh 得 tiòh 救，耶路撒冷 beh 安然 khiā 起；伊 ê 名 beh 稱做，耶和華咱 ê 義。

共同經課 - 2

詩篇二十五篇一節~十節

1 大衛 ê 詩。1) 耶和華 ah，我 ê 心神仰望你 2 我 ê 上帝 ah，我平素 oá 靠你，m̄-thang hō我見笑。M̄-thang hō我 ê 對敵因為贏我來誇口。3 見若 thèng 候你 ê，的確無見笑； Hiah-ê 無緣故行奸詐 ê，beh 見笑。4 耶和華 ah，求你將你 ê 道路指示我，將你 ê 路途教示我。5 求你 chhoā 我 tī 你 ê 真理，koh 教示我；因為你是救我 ê 上帝。我 thong 日 thèng 候你。6 耶和華 ah，求你記念你 ê 憐憫 kap 你 ê 慈愛；因為這是古早以來常常有 ê。7 求你 m̄-thang 記念我少年 ê 罪過，kap 我 ê 過失；耶和華 ah，求你照你 ê 慈愛，因為你 ê 恩惠記念我。8 耶和華是好 koh 正直；所以伊 beh 指示罪人行正路。9 伊 beh 用公平引 chhoā 謙遜 ê 人，伊 beh 用伊 ê 道路教示謙遜 ê 人。10 見若守伊 ê 約，kap 伊 ê 干證 ê 人，耶和華款待 in lóng 是用慈愛誠實。

共同經課 - 3

帖撒羅尼迦前書三章九節~十三節

9 阮 tī 咱 ê 上帝 ê 面前為 tiòh lín 真歡喜，阮為 tiòh chit-ê 一切 ê 歡喜，會用甚麼 ê 感謝為 tiòh lín 報答上帝 ah？10 阮暝日切切祈禱，ài 見 tiòh lín ê 面，來補滿 lín ê 信所無夠。11 願咱 ê 父上帝，kap 咱 ê 主耶穌引 chhoā 阮平坦 ê 路就近 lín。12 也願主 hō lín 相疼，續疼眾人益發充滿，親像阮 ê 疼 lín，13 致到堅固 lín ê 心成聖，無 thang 嫌，tī 咱 ê 父上帝 ê 面前，tī 咱 ê 主耶穌 kap 伊 lóng 總 ê 聖徒 koh 來 ê 時。

共同經課 - 4

路加福音二十一章二十五節~三十六節

25 Tī 日、月、星辰 teh-beh 有兆頭，tī 地上列邦困苦；為 tiòh 海 kap 湧 hoā-hoā 哮，就紛亂；26 人對驚惶以及 thèng 候所 beh 到 tī 天下 ê 事就昏去；因為天上 beh 振動。27 Tī hit 時 beh 看見人子用權能 kap 大榮光坐雲來。28 Tú-tú 有 chiah-ê 事，lín tiòh 挺身起來 kiáh 頭；因為 lín ê 贖回近 lah。29 Koh 用譬喻 kā in 講，試看無花果 kap lóng 總 ê 樹，30 inpuh-í ê 時 lín 看見，就家已知夏天近 lah。31 Án-ni，lín 看見 chiah-ê 事就 tiòh 知上帝 ê 國近 lah。32 我實在 kā lín 講，Chit 世代 iáu-bē 過去，chiah-ê tã-chi lóng beh 成。33 天 kap 地 beh 無去，我 ê 話 boē 無去。34 但是 lín tiòh 家已謹慎，驚了 lín ê 心 hō 貪食、酒醉，kap chit 世間 ê 掛慮 phah 亂，就 hit 日親像活 tauh 忽然到 tī lín；35 因為 hit 日 beh 親像 án-ni 到 tī 見若 khiā 起全地面 ê 眾人。36 但是 lín tiòh tàk 時警醒、祈禱，hō lín 會得閃避將來 lóng 總 ê 事，來 khiā tī 人子 ê 面前。